

**■ TRIBUNA POLITICA**

# L'agroturissem ha potenzial en il Grischun

DA HANSJÖRG TRACHSEL,  
CUSSEGLIER GUVERNATIV

**O**zendi discurra mintgin da l'agroturissem. Tuttina n'è questa purschida interessanta fin oz strusch vegnida remarkada en il Grischun! Quai duai sa midar. Il chantun ha numnadain fixà la finamira da cuntanscher en ils proxims tschintg onns ina rolla impurtanta en l'agroturissem en Svizra.

**I**l Grischun è in chantun cun ina ferma agricultura. D'ina vart cultivescha e tgira quella nosa grondiusa cuntrada da cultura e da l'autra vart producescha el-la victualias d'auta qualitat. L'agricultura represchenta dentant er isanzas e tradiziuns – valurs che vegnan a survegnir dapli impurtanza en l'avègnir. Il Grischun è da stad e d'enviern er in dals chantuns da turissem ils pli impurtants cun purschidas multifaras che han savens in stretg connex cun la cuntrada da cultura e cun la natira. Perquai èsi evident che l'agroturissem sco cumbinaziun da purschidas agriculas e turisticas stuess avair success en noss chantun.

**I**n studi ch'è vegnì fatg per incumbensa dal chantun ha mussà che l'agroturissem ha in grond



potenzial. Las tendenzas socialas en la populaziun mussan che adina dapli giasts tschertgan aventuras en la natira ed eveniments culturals. Spezialitads producidas al lieu, cuntradas cultivadas, experientschas autenticas sco er tradiziuns ed isanzas vegnan dumandadas adina pli savens. Gist en quests secturs po l'agricultura sco purtadra da valurs natirals e culturalas servir cun ina vasta purschida. I vala dentant da coordinar questas purschidas e da las preschentar als giasts en moda versada e professionala.

**P**erquai ha la regenza dal chantun Grischun lantschà la stad 2011 il project «Agroturissem dal Grischun» e mess a disposiziun per ils proxims trais onns ina contribuziun totala dad 1,38 milliuns francs. Il 1. da fanadur ha

il secretariat per l'agroturissem dal Grischun cumenzà cun sia lavur operativa. Il secretariat sco post da consultaziun e da coordinaziun duai facilitar l'integraziun da manaschis interessads en l'agroturissem. El è er responsabel per installar ina rait tranter las acturas ed ils acturs e coordinescha las activitads futuras en connex cun il svilup da las purschidas sco er en connex cun la comunicaziun e cun la vendita.

**L'**agroturissem è dapli l'che durmir en il strom – l'agroturissem cumpiglia ultra da purschidas da pernottar er purschidas d'ospitar ils giasts, pussaivladads da far experientschas sin in bain puril e la realisaziun d'occurrentas, dentant er la commercialisaziun directa da products agriculs. L'agroturissem stat a disposiziun a tut ils manaschis agriculs interessads. El pretenda dentant bler engaschi, cumportament innovativ e conscienza da qualitat. Il chantun ha fatg l'emprim pass e vul gidar a stgaffir structurass professunalas. Las ideas per purschidas attractivas ston dentant vegnir da la basa; i dovra ospitants innovativs. Sche tuttas e tuts collavuran vegni ad esser pussaivel da dar ina fatscha a l'agroturissem en il Grischun.